



Inatsisartuni ilaasortaq  
Jens Napätök', Partii Naleraq  
/Maani

## **Anartarfilerineq pillugu § 37 naapertorlugu apeqquteqaammut nr. 290-2019-imut akissut**

Allakkat ulluat: 04-09-2019  
Suliap nr.: 2015 - 2202  
Akt-id: 11480675

Asasara Jens Napätök'

Postboks 1614  
3900 Nuuk  
Tlf. (+299) 34 50 00  
Fax (+299) 34 54 10  
E-mail: pan@nanoq.gl  
www.naalakkersuisut.gl

Anartarfilerineq pillugu Inatsisartut Suleriaasianni § 37 naapertorlugu Naalakkersuisunut apeqquteqarputit. Apeqqutit uannut akisassanngorlugit innersuunneqarput.

### **1. Naalakkersuisut anartarfeqarnek eqqarsaatigalugu nuna tamakkerlugu qanoq pilersaaruteqarpat?**

Anartarfilerinerup iliuseqarfigineqartarnera kommuunit akisussaaffeqarfigaat. Kommunalbestyrelsi kommuunip illoqarfiini nunaqarfiinilu imermik errortuivikumik eqqaasarnermut pilersaarutininik suliaqartussaavoq. Kommunalbestyrelsi taamatuttaaq anartarfinnik anartarfinit imaartakkaneersunik aammalu imermik errortuivikumik tankiniittunik eqqaanissamut periarfissanik innersuussisussaavoq. Anartarfiit puussiartaasa imaluunniit spandit aaneqartussanngorlugit illut silataanni inissinneqarneranni anartarfiit puussiartaasa imaluunniit spandit imai qimminit, timmissanit aamma uumasunit allanit tikinneqartussaajunnaarlugit inissinneqartussaapput. Anartarfinnik anartarfinit imaartakkaneersunik aammalu imermik errortuivikumik tankiniittunik passussineq aamma assartuineq anartarfiit imaannik aamma imermik errortuivikumik eqqaaneq pillugu Namminersorlutik Oqartussat nalunaarutaat nr. 10, 12. juni 2015-imeersoq naapertorlugu peqqissutsikkut avatangiisinullu isumannaatsumik aammalu kommunalbestyrelsip maleruaqqusaannut naapertuuttumik pisussaapput.

Eqqagassalerinermut suliassaqarfimmut sanaartornermut immikkoortumut pilersaarummi 2015-imeersumi allassimasutut, anartarfilerineq suliniuteqarnermi suliassaqarfiuvoq Naalakkersuisunit annertuumik pingaartinneqartoq. Taamaattumik 2016-imi anartarfilerineq pillugu aaqqiissutissanik nutaanik ineriartortitsinerup aamma misileraanerup iluanni misileraalluni suliniutinut aningaasassat 3 mio. koruunit immikkoortinneqarput. Aningaasassat taakkua kommunini misileraalluni suliniutini marlunni atugassanngortinneqarput, taakkunani anartarfilerinermi eqqagassanik passussinermut periaatsit nutaat misilerarneqarlutik. Taamatuttaaq anartarfilerinermut suliassaqarfimmi pitsanngorsaanissaq qulakkeerniarlugu, Avatangiisinut aningaasaateqarfimmi aningaasassat kommuunini suliaqarnermik tapersiinermut atorneqarsinnaapput.

## **2. Nuna tamakkerlugu anartarfiit sarfatortut imaluunniit gassitortut atuutilersinniarlugit Naalakkersuisut orniginnginnerpaat?**

Anartarfinnik imaartakkanik gassitortunik imaluunniit innaallagiatortunik (anartarfiit ikuallaavillit) nuna tamakkerlugu atuutsitsilernissamut Naalakkersuisut maannakkorpiaq pilersaaruteqanngillat. Anartarfilerinermi iliuuseqarnissaq oqaatigineqareersutut kommuunit akisussaaffeqarfigaat. Kommuneqarfik Sermersuumi aamma Qeqqata Kommuniani anartarfiit ikuallaavillit misilerarneqarput. Misileraanerit takutippaat anartarfiit pisinnaasaat killeqartoq, kiisalu anartarfiit ikuallaavillit pisiarineri ingerlanneqarnerilu akisuujusut. Kommunimi anartarfinnik ikuallaavilinnik misileraanernik annertunerusunik aallartitsinissaq kissaatiginerlugu kommuunit nammineq nalilertussaavaat. Taamatullu pineqartoq anartarfinnut ikuallaavilinnut aningaasaliissanersoq, atuisartut ataasiakkaat nammineq aalajangertussaavaat.

## **3. Nuna tamakkerlugu nutaanik anartarfilersuineq qanoq inuiaqatigiinnut naleqassava?**

Anartarfiit ikuallaavillit nuna tamakkerlugu atuutsinneqalernissaat qanoq akeqassanersoq, naatsorsuisoqarsimanngilaq. Taamaattoq oqaatigineqarsinnaavoq, anartarfik ikuallaavilik ataaseq 25.000 – 35.000 koruunit missaannik akeqartoq, tassunga ilanngutissallutik assartuussinermut, ingerlatsinermut, aserfallatsaaliuineranut kiisalu iluarsaassinermut aningaasartuutit.

Inussiarnersumik inuulluaqqusillunga



Karl Frederik Danielsen